



Fasnachts-Blaggedde 2024

vogelfrei

E Vogel pfyfft huhuu-guguus
Ych woon im neye Vogel-Huus
En Äffli gsellt sich no drzue
Und scho isch fertig mit dr Rue
Drumpeetend mechts no attäschiere
Dr Zolli duet au jubiliere
En Ilp maint mächtig fir dä Aggt
Bruuchts klar e satte Drummel-Taggt
E Pinguin pypst jä gottsaidangg
Han ych jetz schon e Schnitzelbangg
Lutt brüllt e Lai s wär glaub e Sääge
Wenns Bhaltis gäbt wie vo de Wääge
S duet sich e Giraff no drydrugge
Dr Taggt aagää dien denn au Gugge

Das Kääferfescht erinnere schyych
An en Aaloss – s isch dr Vrglyych
Zu unsrem Bruuchdum nid verkeert
Wenn d Fasnacht so dr Zolli eert
Drei Dääg isch d Alldaag-Gnoorzerei
Wyt wägg - mir sinn e bitz vogelfrei
Kai Chef, kai Sitzig und kuum Stryt
Nur yystoo sott men als zer Zyt

S ney Vogelhuus und s Jubiläum
Het denn dr Guido Happle dorum
Zem Aaloss gnoo d Blaggedde z moole
S het s Comité drno empfoole
Loos Guido s miecht in däm Fall Sinn
Du moolsch drzue grad no drei Pin
Denn zletschtamänd wurds sich scho loone
Wenn zwai Basler Institutioone
Jetzt ändlig emool zämmesteen
Das isch doch aifach wunderscheen
Jä d Fasnacht und dr Basler Zolli
Do schängge mir doch s Glaas grad voll yy
Dr Lai brüllt lut no mit me Brüller
Bräggt het si denn dr Mike Müller

Seer lut wirds au wenn s vieri schloot
Und ändlig wider s Liecht abgoot
S wird dierisch, farbig und vyyl mee
Härzligscht - s **Fasnachts-Comité**